



# Međunarodni Dan Roma

obilježava se u čast prvog Svjetskog kongresa Roma, održanog od 8. do 12. aprila 1971. godine u Londonu, jednog od najvažnijih događaja u istoriji romskog naroda.

Usvajanjem odluke o romskoj zastavi i himni na ovom kongresu usvojeni su simboli na romskoj zastavi, zelena boja koja simbolizuje zemlju i plava boja koja simbolizuje nebo. Crveni točak u sredini zastave, predstavlja putovanja i migracije Roma, a službena romska himna temelji se na staroj romskoj pjesmi Đelem, đelem (Idem, idem). Prvi kongres Roma u Londonu, kada su se susreli predstavnici Roma iz 25 zemalja i osnovali Romsku uniju, rezultirao je i proglašenjem službenog romskog jezika (romani chiba), kao i službenim prihvatanjem naziva Rom, a što na romskom jeziku znači čovjek.

Romi su narod koji potiče s prostora današnje Indije. Nakon prvih znakova diskriminacije i progona napuštaju Indiju i u traganju za boljim uvjetima života i prosperiteta naseljavaju se u Evropi. Prvi put pojava Roma u Evropi zabilježena je na području Transilvanije (Rumunija) davne 1416. godine. U hronici grada Forelija (Italija) Romi se spominju 1422. godine. Prvi zvanični podaci o Romima na prostorima Bosne i Hercegovine vezani su za 16. stoljeće. Tada je sultan Sulejman Veličanstveni Romima odobrio nastanjenje i obrađivanje dijela njegovog pašaluka uz plaćanje poreza.

Iako tradicionalno miroljubiv narod, Romi su u većoj ili manjoj mjeri bili žrtva neskrivene diskriminacije i rasizma, pogotovo tokom Drugog svjetskog rata. To je kod romskog naroda probudilo svijest i potrebu za organiziranom borbom u ostvarivanju i zaštiti ljudskih prava. Kako bi razvili strategiju organizirane borbe za svoja prava, Romi svijeta organizuju Prvi kongres Roma svijeta pod parolom: **STOP RASIZMU, DISKRIMINACIJI I PROGONIMA**



U Bosni i Hercegovini Romi započinju svoje organizovanje početkom devedesetih, u okviru humanitarnih organizacija ili udruženja građana, kako bi dali svoj doprinos razvoju romske zajednice u Bosni i Hercegovini i uopšte Roma u svijetu. Za očekivati je da će Bosna i Hercegovina, na svom putu ka evropskim integracijama, podržati uključjenje Roma kao svojih državljana i građana, prije svega u procesima obrazovanja, zdravstva, zapošljavanja, stambene zbrinutosti te očuvanju identiteta i kulturne baštine. Uloga međunarodne zajednice je veoma značajna u smislu pružanja podrške Bosni i Hercegovini na njenom putu uključjenja Roma u društvo.